



Na osnovu člana 15. Zakona o principima lokalne samouprave u Federaciji Bosne i Hercegovine ("Službene novine Federacije Bosne i Hercegovine" broj 49/06 i 51/09) i člana 38. Statuta Općine Hadžići ("Službene novine Kantona Sarajevo" broj 15/09, 17/12, 10/13 i 14/13 – ispravka, 11/18 i 1/20) Općinski načelnik d o n o s i

## **P R A V I L N I K**

### **O SUFINANSIRANJU TROŠKOVA TREĆEG CIKLUSA STUDIJA I TROŠKOVA SPECIJALIZACIJE IZ ZDRAVSTVENIH OBLASTI**

#### **Član 1.**

Pravilnikom o sufinansiranju troškova trećeg ciklusa studija i troškova specijalizacije iz zdravstvenih oblasti (u daljem tekstu: Pravilnik) se propisuju uslovi i način dodjeljivanja sredstava iz budžeta Općine Hadžići studentima trećeg ciklusa studija za sufinansiranje troškova studiranja i specijalizantima iz zdravstvenih oblasti kojima je odobrena specijalizacija na lični zahtjev.

Sredstva iz stava. 1. ovog člana se dodjeljuju studentima trećeg ciklusa studija i specijalizantima iz zdravstvenih oblasti kojima je odobrena specijalizacija na lični zahtjev koji imaju prebivalište na području Općine Hadžići, što se bliže propisuje članom 5. ovog Pravilnika.

#### **Član 2.**

U ovom Pravilniku upotrebljavaju se pojmovi sa sljedećim značenjem:

Treći ciklus studija (doktorski studij) je studij za sticanje akademskog stepena doktora nauka odnosno doktora umjetnosti i predstavlja najviši stepen formalnog obrazovanja čija je svrha obrazovanje novih doktora nauka ili umjetnosti izradom doktorske disertacije na osnovu istraživanja.

Specijalizacija iz zdravstvenih oblasti na lični zahtjev je specijaliziranje zdravstvenih radnika koji su doktori medicine, doktori stomatologije, magistri farmacije i inženjeri medicinske biohemije sa završenim drugim ciklusom VSS ili koji su ove akademske titule stekli prije stupanja na snagu Pravilnika o načinu i postupku odobrenja specijalizacije odnosno subspecijalizacije državljanima Bosne i Hercegovine na lični zahtjev ("Službene novine Federacije Bosne i Hercegovine" broj 68/10 i 81/10).

#### **Član 3.**

Sredstva za sufinansiranje troškova iz člana 1. ovog Pravilnika se obezbjeđuju u bužetu Općine Hadžići na organizacionoj jedinici Službe za opću upravu, društvene djelatnosti i zajedničke poslove, vrsta rashoda: sufinansiranje troškova trećeg ciklusa studija i specijalizacije iz zdravstvenih oblasti.

#### **Član 4.**

Za dodjeljivanje sredstava za sufinansiranje troškova iz člana 1. ovog Pravilnika Općinski načelnik putem Službe za opću upravu, društvene djelatnosti i zajedničke poslove objavljuje javni poziv koji se objavljuje na oglasnoj ploči i oficijelnoj web stranici Općine Hadžići.

Javni poziv se objavljuje jednom tokom akademske godine ako su u budžetu Općine Hadžići predviđena sredstva za sufinansiranje troškova iz člana 3. ovog Pravilnika.

#### **Član 5.**

Student trećeg ciklusa studija i specijalizant koji sam finansira troškove specijalizacije iz zdravstvene oblasti može po objavljenom javnom pozivu aplicirati za dodjelu sredstava pod sljedećim uslovima:

- a) da je državljanin Bosne i Hercegovine,
- b) da je tokom drugog ciklusa studija (master/magistarski studij), odnosno prije odobrenja specijalizacije u trajanju od najmanje tri godine imao prebivalište na području Općine Hadžići i da u vrijeme objavljivanja javnog poziva ima prebivalište na području Općine Hadžići,
- c) da je student trećeg ciklusa studija na jednom od univerziteta u Kantonu Sarajevo, odnosno specijalizant u jednoj od zdravstvenih ustanova u Kantonu Sarajevo kojem je odobrena specijalizacija na lični zahtjev,
- d) da je prvi put upisan na odgovarajuću godinu trećeg ciklusa studija (da ne obnavlja godinu).

#### **Član 6.**

Za ispunjavanje uslova iz člana 5. ovog Pravilnika se uz prijavni obrazac prilaže odgovarajuća dokumentacija što se bliže uređuje tekstem javnog poziva.

#### **Član 7.**

Služba za opću upravu, društvene djelatnosti i zajedničke poslove zaprima aplikacije na javni poziv i vrši provjeru blagovremenosti i ispravnosti dostavljene dokumentacije te sačinjava Odluku iz člana 8. ovog Pravilnika. Sastavni dio Odluke je iznos sredstava koja se dodjeljuju aplikantu.

U slučaju da ima deset i više aplikanata, Općinski načelnik imenuje Komisiju koja provodi aktivnosti iz stava 1. ovog člana, osim zaprimanja aplikacija na javni poziv.

Aplikanti koji apliciraju na javni poziv, a čija dokumentacija zadovoljava uslove javnog poziva, imaju pravo na dodjelu sredstava iz stava 1. ovog člana u iznosu do 2000,00 KM.

Na aplikante koji ispunjavaju uslove javnog poziva se ravnomjerno raspoređuju sredstva iz budžeta Općine Hadžići namjenjena za sufinansiranje trećeg ciklusa studija i troškova specijalizacije iz zdravstvenih oblasti.

#### **Član 8.**

Općinski načelnik donosi Odluku o preliminarnoj listi kandidata koji ispunjavaju uslove za dobijanje sredstava za sufinansiranje troškova trećeg ciklusa studija i troškova specijalizacije koja se objavljuje na oglasnoj ploči i oficijelnoj web stranici Općine Hadžići.

Sastavni dio ove Odluke je lista kandidata koji ne ispunjavaju uslove javnog poziva.

Prigovor na Odluku iz stava 1. ovog člana aplikanti na javni poziv mogu podnijeti Općinskom načelniku u roku od osam dana od dana njenog objavljivanja. O prigovoru odlučuje Općinski načelnik putem Službe za opću upravu, društvene djelatnosti i zajedničke poslove.

#### **Član 9.**

Nakon isteka roka i rješavanja po prigovoru, Općinski načelnik objavljuje konačnu Odluku dobitnika sredstava po javnom pozivu za sufinansiranje trećeg ciklusa studija i troškova specijalizacije iz zdravstvenih oblasti.

#### **Član 10.**

Sa dobitnicima sredstava iz člana 9. ovog Pravilnika Općinski načelnik putem Službe za opću upravu, društvene djelatnosti i zajedničke poslove zaključuje ugovor kojim se bliže regulišu međusobna prava i obaveze kao i način uplate sredstava.

#### **Član 11.**

Stupanjem na snagu ovog Pravilnika stavlja se van snage Pravilnik o sufinansiranju troškova trećeg ciklusa studija i troškova specijalizacije iz zdravstvenih oblasti broj 02-11-3-9785/23 od 09.10.2023. godine i Pravilnik o izmjenama i dopunama Pravilnika sufinansiranju troškova trećeg ciklusa studija i troškova specijalizacije iz zdravstvenih oblasti broj 02-11-3-13058/24 od 22.10.2024. godine.

#### **Član 12.**

Ovaj Pravilnik stupa na snagu danom donošenja i biće objavljen na oficijelnoj web stranici i oglasnoj ploči Općine Hadžići.

Broj: \_\_\_\_\_  
Hadžići, 31.01.2025. godine

OPĆINSKI NAČELNIK

Eldar Čomor, prof.